

Minister Otmar Oduber:

Carlson Group y RIU tabata na altura di e maneho di Gobierno pa loke ta All Inclusive

Dialuna atardi Minister Otmar Oduber tabatin un rueda di prensa pa asina elabora riba e benta di Radisson y posicion di Gobierno den esaki.

El a indica cu den e proceso di benta di Radisson, cual ya caba a bin ta tumando luga pa casi 1 aña y cu hasta un oferta a tuma luga, Carlson Group y Gobierno tabatin contacto na varios ocasion pa papia riba dje. Durante e contactonan aki Gobierno di Aruba a muestra e importancia pa nos isla di e maneho pa loke ta trata All Inclusive.

Ya caba for di 2013 Gobierno a haci un anuncio publico caminda a notifica cu riba e maneho cu tabatin pa cu e moratorio pabou di nos isla (cu ta exclui e parti pariba di nos isla) ta inclui e parti cu ta bisa cu pa companianan existente y/of companianan nobo si kier bin cu operacion di All Inclusive, esakinan lo mester haya un aprobacion di Gobierno di Aruba prome cu esaki por tuma luga. Despues di esaki, na juni 2014 Oficina di Turismo como e organo oficial di turismo como e wordo instrui dor di Minister Oduber pa cuminsa un proceso pa legislacion pa loke ta trata reglamentacion di All Inclusive na Aruba.

Oficina di abogado di Sr. Allan Kuster ta esun cu a wordo acerca e tempo ey. Consejo cu a wordo duna ta cu ta bon pa basa esaki riba un rapport cual a wordo traha tambe; e prome fase a wordo presenta na october 2014 y e di dos na maart 2015 y awor ta den su fase final pa wordo entrega. E rapport aki ta haci estudio-nan necesario pa mira kico e impacto economico ta di All Inclusive. A pesar cu e tendencia global ta pa atrae e mercado di All Inclusive na nan compleho, sinembargo por mira den e rapportnan preliminar cu ta hopi dificil pa haya informacion riba kico e impacto di All Inclusive ta riba economia di e luganan unda nan ta opera.

“Pa nos e ta hopi cla, desde 2 aña pasa cu nos a cuminsa e proceso aki nos a bisa cu nos a diferente, e ta un escogencia cu e Gobierno aki a haci di bisa cu nos ta un comunidad chikito, cu nos tin un inventario chikito di apenas 9mil camber na e momentonan aki y nos como Aruba ta scoge pa bay den e direccion di turismo di calidad, e turismo afluente y no ta bay competi cu otro paisnan manera Cancun, Republica Dominicana, Jamaica y otronan”, Minister di Turismo a duna di conoce. Minister Oduber a bolbe remarca cu a notifica Carlson



Group adelanta riba maneho di Gobierno y pa sorpresa di tur hende siman pasa diahuebs Gobierno a wordo notifica y despues diabierna confirma dor di abogado di RIU cu lo tin un posibel acuerdo cu lo a wordo yega entre Carlson y RIU. Gobierno di su banda a notifica inmediatamente e abogado cu esaki ta contra di e maneho cu ta conoci pa RIU y pa Carlson Group y cu Gobierno di Aruba no lo coopera pa e posibel tumamento over di Radisson dor di un All Inclusive na Aruba. Diabierna atardi tambe a haya

contacto cu Carlson Group y a notifica nan cu esaki ta contra cu loke ta e acuerdo cu Gobierno, contra di e maneho cu nan a wordo poni na altura. Mientras tanto dialuna mainta den corte a haya sa cu e proceso entre RIU y Carlson a dura 8 dia for di momento cu nan a cuminsa negocia te ora nan a cera, esaki a pesar cu pa lunanan nan tabata cu un compania cu tabata cumpliendo cu e ‘due diligence’ necesario. Esaki, pa Gobierno di Aruba ta un muestra cu no ta un bon ciudadano, un bon partner di Aruba. Minister Otmar Oduber a

bisa cu e proceso aki tabata un dificil mirando cu ta trata di un transaccion priva, algo cu normalmente Gobierno no ta mete den dje, pero den e caso aki a mira cu bienestar general ta pisa mas y a dicide di uni na e caso dialuna mainta.

“Aruba ta e di tres pais den mundo cu ta mas dependiente di turismo, e bienestar general ta duna cu nos mester por salvaguardia nos economia y hotelnan existente mester por compronde tambe cu nos mester salvaguardia esaki”, Minister Otmar Oduber a indica. □